

1166 Morgedialog 2.

Im Schlafzimmer git`s Bewegig im Bett.

„Schatz, bisch wach?“

„HmMMM! Nonig ganz.“

Drei Minute Pause.

Neue Versuech vo mir: „Hesch guet gschlafe?“

„Nei! Aber hesch au gseh was für Zyt dass es isch?“

Min Griff übere zum Radiowecker. „Au! Isch ja nonig emol Feufi am Morge.

Sorry!“

Drei Minute Pause.

„Warum hesch nöd guet gschlafe?“

„Will du gsaget hesch.“

„Ich schnarchle doch nöd.“

„Mol, du hesch gschnarchlet. En ganze Wald hesch umtah!“

„Das cha nöd sy, will won ich is Bett ha welle, da hesch **du** scho gschlafe und e so gschnarchlet, dass ich grad wieder Rechtsumkehrt gmacht ha und no einisch en Film agfange ha luege im dritte Zimmer. Dört bin ich denn igschlafe während em Film und erscht um Zwei am Morge wieder verwachet. Also muesch du träumt ha ich schnarchli, oder du hesch dich selber ghört schn...“

„Nei, nei, nei! Dä chasch nöd bringe. Ich schnarchle nie. Fraue schnarchle sälte oder gar nie!“

„Es git aber Usnahme. Eini bisch du, liebe Schatz. Weisch no die letscht Wuche, wo ich uszoge bin und...“

„Ja, jetzt bringsch wieder die sältene Usnahm füre, wo ich emol e chli viel Wy.....,“

„Aha, sältene Usnahm seit me dem?“

„Du willsch doch nöd säge, ich....“

„Nei! Du verschtahsch mi falsch. Ich meine, die sältene Usnahm wo du mal schnarchlich und nöd weg em Glas Wy z`viel, du Joggeli!“

„Ach lass mich jetzt no chli schlafe, ich will jetzt nöd diskutiere. Es isch no viel z`früh zum schtryte.“ Sie dreht sich uf die anderi Site und fangt a.....
schnarchle!!!